



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
06 Novembru 2013

JSMP konsidera alegasaun suspensaun ba krime infantisiduu la prevene krime hanesan iha futuru

Iha 05 Novembru 2013 Tribunál Distritál Dili hala'o julgamentu ba kazu infantisiduu ne'ebé komete husi arguida FS hasoru nia oan rasik, iha Distritu Díli.

Ministériu Públiku akuza katak iha 10 Feveireiru 2004 kalan, arguida partus bebe mane ida, arguida husik bebe ne'e to i'is kotu tanba la kesi bebe nia husar. Bebe nia i'is kotu, arguida falun bebe ho nia rouna no tau hamutuk iha plastik laran no kesi metin.

Iha 11 Feveireiru 2004 maizumenus tuku 09:00 dadeer, arguida lori bebe ba soe iha fatin lisu nian (sampah). Motivu husi akontesimentu ne'e tanba arguida sente moe ba nia familia no ba vijinho sira.

Ministériu Públiku akuza arguida kontra artigu 142 Kódigu Penál kona-ba infantisiduu ne'ebé ho nia pena abstratu entre tinan 3 too tinan 10 prizaun.

“JSMP kumpriende katak iha fatór estradináriu ne'ebé provoka arguida hodi komete krime ne'e. Mesmu nune'e krime infastisiduu nu'udar krime ne'ebé todan tanba aktu ne'e rezulta bebe ne'ebé inosente tenke simu konsekuensia ba hahalok arguida nian”, dehan Diretór Ezekutivu JSMP, Luis de Oliveira Sampaio.

Iha julgamentu arguida deklarara ba tribunál katak faktus sira ne'ebé Ministériu Públiku akuza ba nia ne'e lo'os hotu.

Tuir depoimentu testamuña katak rezultadu otopsia ba bebe ne'e, laiha motivaun hanesan buti ou lori buat kro'at ruma hodi estraga bebe nia isin.

Testamuña reforsa katak bebe ne'e mate tanba arguida tau iha plastik laran no kauza bebe nia i'is kotu.

Tuir depoimentu testamuña ne'ebé nu'udar arguida nia namoradu katak wainhira arguida komete hahalok ne'e, testamuña lahatene tanba sira la hela hamutuk. Maibe nia rekoñese konsege halo relasaun seksuál ho arguida.

Bazeia ba sirkunstansia no faktus hotu ne'ebé produz iha audiénsia Ministériu Públiku husu ba tribunál kondena arguida tinan 1 prizaun suspende ba tinan 2 prizaun.

“JSMP hanoin katak Ministériu Públiku tenke asegura atu promove alegasuan ne’ebé adekuada tuir krime nia gravidade hodi evita krime hanesan akontese iha futuru”, dehan Diretor Ezekutivu JSMP, Luis de Oliveira Sampaio.

Husi parte defeza hare katak arguida primeiraves komete krime, husu ba tribunál atu absolve arguida. Tribunál iha hanoin seluk bele aplika pena prizaun fulan 6 no suspende ba tinan 1.

Kazu ne’e julga ho Númeru Prosesu: 517/2011/TDD no prezide husi juiz presidente Dr. Jose Maria Araújo, Dr. Julio Gantes (Juiz Internasionál) Dra. Francisca Martins. Ministériu Públiku representa husi Dra. Gloria da Silva (Prokuradór Internasionál) no arguidu hetan defeza husi Dr. Cançio Xavier husi Eskritóriu Defensória Públiku. Oficial justisa ne’ebé responsavel iha prosesu mak Sr. Nelson Borges.

Julgamentu kontinuasaun rona leitura akordaun laron 26 Novembru 2013, tuku 15:00 lokraik rona desizaun finál.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl